



VAŠA PRAVA BiH  
Legal Aid Network

Udruženje «Vaša prava Bosne i Hercegovine»  
Удружење «Ваша права Босне и Херцеговине»  
Udruga «Vaša prava Bosne i Hercegovine»

Sarajevo, Ulica Safeta Hadžića br.66A; tel/fax +387 (0)33 789-105;  
e-mail: sarajevo@vasaprava.org

Bosna i Hercegovina

Federacija Bosne i Hercegovine

PARLAMENT FEDERACIJE  
SARAJEVO

Datum: 23.10.2020. godine  
Broj: ID-25-I/20

Parlament Federacije Bosne i Hercegovine  
Dom naroda Parlamenta Federacije Bosne i Hercegovine  
Ul. Hamdije Kreševljakovića broj 3  
71000 Sarajevo

N/r Predsjedavajući Doma naroda Parlamenta Federacije BiH Tomislav Martinović  
N/r delegatima Doma naroda Parlamenta Federacije BiH

Primljeno:	28-10-2020		
Org. jed.	Broj	Priloga	Valjavnost
02:02/c	-02-	1923	20

**Predmet:** Inicijativa za usvajanje Prijedloga za izmjenu i dopunu Prijedloga Zakona o dopunama Zakona o vanparničnom postupku

Poštovani,

U skladu sa odredbom člana 151., a u vezi sa članovima 155. stav (2), 172. , 177. i 178. Poslovnika o radu Predstavničkog doma Parlamenta Federacije, dostavljamo vam inicijativu za usvajanje Prijedloga za izmjenu i dopunu Prijedloga Zakona o dopunama Zakona o vanparničnom postupku, te vas molimo da isti razmotrite i uvrstite u Zakon o dopunama Zakona o vanparničnom postupku.

Naime, na 15. redovnoj sjednici Predstavničkog doma Parlamenta Federacije, održanoj dana 14.10.2020. godine, usvojen je Prijedloga Zakona o dopunama Zakona o vanparničnom postupku bez razmatranja primjedbi na isti, a koje je Udruženje „Vaša prava BiH“ pravovremeno i prije održavanja navedene sjednice dostavilo predsjedavajućem Predstavničkog doma Parlamenta Federacije BiH, gđin.-u Mirsadu Zaimoviću, na razmatranje i dalje postupanje.

Obzirom da se radi o Prijedlogu Zakona čije bi usvajanje u predloženom tekstu moglo imati za posljedicu neusklađenost sa međunarodnim standardima iz ove oblasti, želimo da vas podsjetimo da je pravo na upis u matičnu knjigu rođenih i pravo na državljanstvo jedno od temeljnih ljudskih prava utvrđeno i zagarantovano brojnim međunarodnim sporazumima koje je Bosna i Hercegovina ratifikovala i to Univerzalnom deklaracijom o ljudskim pravima iz 1948. godine, Konvencijom o pravnom položaju lica bez državljanstva iz 1954. godine, Konvencijom o smanjenju broja lica bez državljanstva iz 1961. godine, Međunarodnim paktom o građanskim i političkim pravima iz 1966. godine i Konvencijom o pravima djeteta iz 1989. godine.

Imajući u vidu sve naprijed navedeno, molimo vas da prilikom usvajanja Zakona o dopunama Zakona o vanparničnom postupku razmotrite ovu inicijativu Udruženja „Vaša prava BiH“.

U prilogu Vam dostavljamo tekst Prijedloga izmjena i dopuna Prijedlog Zakona o dopunama Zakona o vanparničnom postupku

U prilogu:

- Tekst Prijedloga izmjena i dopuna Prijedloga Zakona o vanparničnom postupku



Izvršni direktor

Udruženje "Vaša prava BiH"

Emir Prcanović

**PRIJEDLOG IZMJENA I DOPUNA PRIJEDLOGA ZAKONA O  
VANPARNIČNOM POSTUPKU**

Član 73g.  
(Sadržaj rješenja)

Rješenje kojim se utvrđuje vrijeme i mjesto rođenja sadrži sljedeće podatke o osobi čije se vrijeme i mjesto rođenja dokazuje:

- a) ime i prezime,
- b) spol,
- c) dan, mjesec, godinu i sat rođenja,
- d) mjesto rođenja i
- e) podatke o njegovim roditeljima, ako su poznati.

**Smatramo da bi u odredbu člana 73 g. iza tačke e) trebalo uvrstiti dodatnu tačku f) koja glasi:**

**„Član 73g.  
(Sadržaj rješenja)**

[...]

**f) i državljanstvo BiH ukoliko ga je moguće utvrditi“**

Član 73f.  
(Ročište)

(3) Sud će odrediti da sudski vještak odgovarajuće specijalnosti pregleda osobu čije se vrijeme i mjesto rođenja dokazuje i da nalaz i mišljenje o njegovim godinama života.

**Udruženje „Vaša prava BiH“ je stava da se u članu 73f. stav (3) riječ „će“ treba zamijeniti riječi „može“, tako da navedeni stav glasi:**

**„Član 73f.  
(Ročište)**

[...]

**(3) Sud može odrediti da sudski vještak odgovarajuće specijalnosti pregleda osobu čije se vrijeme i mjesto rođenja dokazuje i da nalaz i mišljenje o njegovim godinama života.**

Član 73k.  
(Troškovi postupka)

Troškove postupka za utvrđivanje vremena i mjesta rođenja osobe snosi predlagatelj.

**Smatramo da bi odredba člana 73k. trebalo da glasi:**

**„Član 73k.  
(Troškovi postupka)**

**U postupku za utvrđivanje vremena i mjesta rođenja predlagatelj je oslobođen od plaćanja taksi i drugih troškova postupka, a troškovi vještačenja u tom postupku isplaćuju se iz sredstava suda.“**

## O B R A Z L O Ž E N J E

### PRIJEDLOGA IZMJENA I DOPUNA PRIJEDLOGA ZAKONA O VANPARNIČNOM POSTUPKU

Smatramo da bi u odredbu člana 73 g. trebalo dopuniti na način da se u okviru postupka utvrđivanja vremena i mjesta rođenja utvrdi i činjenica državljanstva iz razloga efikasnosti i ekonomičnosti postupka. Osoba za koju se utvrdilo vrijeme i mjesto rođenja ne bi morala po okončanju sudskog postupka utvrđivanja vremena i mjesta rođenja voditi još jedan upravni postupak utvrđivanja državljanstva.

Smatramo da se u članu 73f. stav (3) riječ „će“ treba zamijeniti sa riječi „može“ iz razloga što ovako formulirana odredba podrazumijeva obavezu suda da u svim postupcima nalaže vještačenje životne dobi i starosti osobe za koju se utvrđuje mjesto i vrijeme rođenja iako u nekim postupcima ovo nije neophodno, jer postoje drugi dokazi na osnovu kojih se može utvrditi vrijeme rođenja. (npr. medicinska dokumentacija o rođenju itd).

Smatramo da bi odredbu člana 73k. trebalo izmijeniti na način da postupci za utvrđivanje vremena i mjesta rođenja budu oslobođeni od plaćanja taksi i drugih troškova postupka, dok bi troškovi vještačenja u ovim postupcima trebali biti isplaćeni iz sredstava suda iz razloga što se postupci utvrđivanja vremena i mjesta rođenja provode za pravno „nevidljiva lica“ bez bilo kakvih dokumenata, zaposlenja, imovine i prihoda, odnosno radi se o osobama lošeg imovnog stanja.

Osim toga, propisivanje obaveze plaćanja sudskih taksi i troškova postupka ima za posljedicu kršenje prava predlagatelja na pristup sudu iz člana 6. Evropske konvencija za zaštitu ljudskih prava i osnovnih sloboda (pravo na pravično suđenje). Naime, propisivanjem obaveze plaćanja taksi za „pravno nevidljiva“ lica koja su u pravilu bez bilo kakve vrste prihoda, na njih kao predlagatelje stavlja pretjerani teret, te samo pravo na pokretanje i provođenje postupka utvrđivanje vremena i mjesta rođenja čini iluzornim.